

## TENIMUS PRESSE...

Est totu cambiadu  
in cust'alenu curzu de sa vida.  
Nemmancu su beranu paret issu:  
non dat pius signales  
de sos suos colores de incantu:  
quasi ch'est isparidu  
su balsamicu nuscù 'e sos fiores;  
e non s' idet pius  
su nostalgicu arrivu  
de sas amigas rundineddas mias.

Solu unu 'entu siccu  
mi sulat e fastizat,  
attuddindemi tota sa carena  
cun libidos carignos de tristura.

Torra ancora beranu  
cun cantos d'amistade,  
faghe intender sa dulce ninna nanna

chi cantat sa mama a su fizu,  
astrintu fort'a sinu  
cun sos brazzos che cadenas d'amore.  
Totu est isparinde:  
ca presse tenimus d'arrivare,

olvidende sos passos de su tempus  
in chilca 'e cuntentare  
s'ingurda brama de s'anima tzega.

Torra beranu torra  
cun signales de vida,  
e porri dae nou  
sos licanzos sabores de s'ispera.